

Ciudadano ta reporta otro caso lamentabel di destruccion di neishi di shoco pa motibo di offroad

Recientemente riba rednan social un usuario a publica un video cu ta demostra un suceso lamentabel. Un biaha mas personanan cu ta haci “off-road” ta destrui un neishi di shoco den cual tabatin tres baby shoco aden. E publicacion a ricibi un cantidad di reaccion di personanan disgusta cu ta haci yamado na e gobernantenan pa haci algo y stop e actividadnan aki cu ta dañino pa e flora y fauna.



Den e video publica diahuebs atardi ta mustra con e area a keda despues cu e vehiculonan a pasa eynan y por hasta mira con un baby shoco ta bula sali for di e neishi cu e personanan aki a destrui.

Ciudadanonan disgusta a reaccion y a laga comentari- onan den cual nan expresa nan disgusto cu e tipo di situacionnan asina ta sucede ainda y ta haci un yamado urgente na e gobernantenan pa haci algo tocante e vehiculonan aki, prohibi nan core den cierto area of prohibi e uso di tipo di vehiculonan di off-road den su totalidad.

“Ta tempo pa stop e cos aki, hopi tristo” ; “Ta tempo pa tuma accion, algo mester ser haci a.s.a.p (mas pronto posibel)” ; “Demasiado, ta nifica mas daño, sin ningun control di gobierno,” ta algun di e comentarionan cu varios usuario a laga expresando nan disgusto y tristesa pa e sucedido.

Otro usuario tambe a cuestion ki dia e tipo di actonan asina lo stop. “Cuanto di e bunita parhanan aki nos mester perde pa e gobierno di Aruba stop e cos aki? Ora cu e shoconan bay, nan a bay pa semper. Es decir extinto. Dios e cos aki ta haci dolor,”

e usuario a remarca.

E ciudadano cu a publica e video a splica cu e area aki tin borch y tin cabuya cu ta indica bon cla cu tin neishi di shoco eynan. Pero e shoconan a dicidi di traha un di dos y di tres buraco cerca di esun original, pasobra nos guianan di tour di jeep a dicidi di para nan vehiculonan grandi cu hende banda di dje.

El a remarca cu personanan cu ta haci offroad generalmente no tin ningun sentido comun ni respet pa naturalesa y a subraya cu esey ta un motibo importante pakico actividad aki mester ser regula y eventualmente prohibi.

Otro usuario, ken ta forma parti di e ekipo di Aruba Conservation Foundation, a comenta riba e publicacion cu ayera e fundacion a restaura y a extende e proteccion di neishi, a monitor e buraco y a haya dos shoco pafo y tres den e buraco.

Tipo di sucesonan manera esaki ta un topico cu ta keda vigente den comunidad. No ta prome biaha cu ciudadanonan ta usa e poder di rednan social pa trece casonan asina den luz di dia y pa busca ayudo di e instancianan concerni.

Den ultimo añanan, sho-

conan ta bin enfrentando desafionan cada biaha mas grandi na luganan di reproduccion sigur y adecua na varios area di e isla.

Tera Cora, e zona patras di campo di golf di Tierra del Sol, algun biaha tabata un zona di biodiversidad halto y tambe tabata un di e luganan di reproduccion mas importante pa e shoco.

Den un esfuerso pa mehora e sobrevivencia di e shoco a inicia e proyecto di conservacion cu ta consisti di instalacion di neishinan artificial pa brinda e shoconan oportunidadnan di reproduccion alternativo.

Mas di 90% di nan neishi natural na Tera Cora a ser destrui den algun año, despues di introduccion di turismo di aventura y te e fecha hopi shoco ta muri pa e coremento imprudente di autonan todo terreno. Ta conoci cu tanto na nivel internacional como local, turismo insostenibel di Aruba, incluyendo e asina yama turismo di “aventura” a yega na un costo hopi halto pa medio ambiente y biodiversidad di e isla.

E introduccion di neishinan artificial di Shoco na Aruba ta forma parti di e Conservacion di Shoco Programa,



un iniciativa cooperativo cu a cuminsa na 2017 entre e NGO local su Aruba Birdlife Conservacion y Fundacion Conservacion di Aruba, ademá di The Global Owl Project (U.S.A.). Den e proximo añanan, tin plania pa pone mas cueba artificial rond di e isla, brindando na e Shoconan cu oportunidadnan di cria adicional y mas sigur segun cu e isla ta sigui desaroya.

Te cu awor, nan a logra pone mas cu 60 buraco artificial. Nan meta ta pa alcanza 500 den e proximo añanan, poniendo nan rond di e isla na luganan sigur pa duna na e shoconan un oportunidad alternativo pa haci neishi.

E shoco, of Aruba Burrowing Owl, ta un sub-especie

enemigo y su existencia ta seriamente menasa cu un calculacion di 200 par di cria of menos. Na 2012, e Shoco a ser declara un simbolo nacional di Aruba y e prikichi na 2017 como e parha nacional, di e 270 especienan di parha registra na Aruba, e shoco y e prikichi ta e unico dos especienan endemico di Aruba.

Ta importante pa chauffeurnan core cu mas cautela na momento cu nan ta cerca di un neishi di shoco of ora cu nan wak uni cerca. Tambe ora cu haci “off-road” cu ATV of UTV, mester sigura cu e vehiculonan aki ta keda riba e caminda indica ya cu neishinan di shoco no ta facil pa wak y ta mas facil pa perhudica of destrui un neishi.

